

SAPURI D'ANTICU

BAGGHIU ANTICU

Li pini, lu nuci, lu cancellu... e,
la casa, tutta viridi pi lu lippu:
li mura ancora addritta pi scummissa
e l'erva, c'accummogghia tutti cosi.

Marotta mia! Lu bagghiu di 'na vota,
un paraddisu tuttu rosi e ciuri!
Lu cori chianci, la gula suffuchia...
Centu riordi mi sfilanu davanti!:

Me' nonnu Bertu c'a scupetta 'n coddu;
me' patri cu trippedi e cannucciali;
me' matri, li me' frati, li me' soru...
Poi, tutti li cosi di 'ddi tempi:

la fatta di lu pani e di' miliddi;
la jncuta di l'acqua o' puzzu a Cubba;
li ficu sicchi, lu strattu, 'i rianati;
li cantati di sira a lu timpuni...

E pensu o' Locu chi paria un jardinu,
cu li viola, frutteti e siminati!
Trasu 'nta stadda ('a porta è tutta rutta):
c'è 'u smilaturi misu a cantunera.

E la menti m'appresenta pi davanti
a me' patri, bonarma ('u voli dittu),
'mpasturatu cu mascara e cu nguanti
e 'na cajella longa sin'e' pedi.

Sfila un tilaru d'un fasceddu chinu:
mi duna un pezzu 'i vrisca cu lu meli.
La sazzu... Ma chi dicu? Fantasiu!
Quanti riordi 'sta Marotta antica,

lu Locu di me' patri e di li nanni!
Ora... siccumi, ruvini e l'abbannunu.
Sulu li mura, addritta pi scummissa
e 'st'erva, c'accuppuna li riordi.

L'OPIRA DI' PUPI

Doppu l'abbentu da' televisioni
ch'i so' prugrammi veru 'ntirissanti
fatti di jochi, juchitti e nutizziani
cu droga, rapimenti e ammazzatini,

chi ci trasia 'sta pinsatina stramma
di quattru foddi fora di lu tempu
chi armaru tiatru e pezzi 'i lignu
p'apprisintari: l'Opira di' Pupi?!

E chi semu a li tempi d'antiverra
cu Filidicu, 'a calia e la simenza?
Cu Orlandu, Rinardu e Carlu Magnu,
cu Arganti, Clorinda e cu Tancredi?

Veru è chi a la fini s'imparava
'a storia di' Cruciati e Palatini;
ma cu chiddu chi avemu di 'sti tempi
chi ni facemu di 'sti stori antichi?!

Rigidíri di chiù di cinquant'anni
e turnari a li tempi d'ottucentu?!
Megghiu jochi, juchitti e nutizziari
chi tiatrinu cu l'Opira di' Pupi.

SANTA LUCIA

«Va susitivi ch'è tardu
addumati la cuccia
e s'un mi ni dati a mia
la pignata vi scattia».

Riordi picciriddi:
Filastrocca
cantata pi li strati
di bon'ura. E...
la tuppuliàta forti
nta li porti;
li fimmini 'nchiffarati
cu quadàra e cu cuccia;
la cunzata
cu vinu cottu e meli.
Ora...
lu risu, li fritteddi, l'arancini...
Lu frumentu cu li ciciri
unn'è cosa.
Ma...
lu cori chianci
a 'ddu riordu picciriddu!

QUATRI

Sissantasitt'anni:
'na vita!
Si ci pensu
viu... quatri.
Cincu, deci, vinti,
ma... quatri!
Sissantasitt'anni:
'na ciatata!
Quatri
chi mi sfilanu davanti
nt'on minutu.

GRUTTI DI MAROTTA

Vi vardu di luntanu
grutti antichi di Marotta!
Nun è chiù lu tempu
quannu, picciutteddu,
appiccicannu a tipu crapa,
jucava cu vuátri;
e mi cuntavu stori fantasiusi
d'armali d'atri tempi,
di giganti, di draghi e di ciclopi.
Di luntanu ora vi vardu...
e ancora mi parlati.
Ma ora...
li capiddi janchi,
li surca nta la facci...
La 'nnuccenza picciridda
'a riartà da' vita
'a cancelláu.

CUMPAGNEDDU DI VANCU

Causi curti, murriti nta li manu,
'a testa o' jocu, a cutuliari 'i genti,
eramu animuli, santi diavuluna!
Du' picciutteddi c'u focu nta li vini.

Scola? Libbra? Li compiti? 'I lizzioni?
'U giustu giustu, 'ncuddati c'a sputazza.
Lu pinseri a fari matascini,
o' tricchi-tracchi, a sparari dacadà.

Passau lu tempu... e addivintammu granni:
iddu avvucatu ed iu cu la me' scola.
Vinniru 'i mogghi, 'i figghi e tanti guai:
pigghiati 'n chinu da' rota di la vita.

Quannu San Petru sunau la ritirata,
s'arricughhiu comu tanti e tanti.
E' dda: aspetta 'u cumpagneddu 'i vancu
pi cutuliari li Santi 'n Paraddisu.

PINNATA MIA

Pinnata mia,
fai sempri la to' parti;
si' sempri 'na sirena 'ncantatura.
Parenti, amici, genti di passagiu,
a tutti chi ci lassi 'u to' riordu:
pi 'na manciata di pani o 'na pizzziata,
pi 'na fatta di sosizza nta la braci,
pi 'na sirata cu canti e cu chitarra.
Ma forse chiù
p'u fattu da' buffetta e di' cannati,
pi li seggi 'mpagghiati c'a curina,
p'a to' maida, p'u furnu, 'u scutiddaru...
Picchè parli di cosi d'atri tempi!:
di Sicilia e di lingua siciliana,
di cosi antichi di la nostra terra,
di l'usanzi di' patri e di li nanni.